

Ikiaroorartut pillugit Inatsisartut inatsisaat nr. 24, 25. novembari 2022-mersooq

Nalinginnaasumik aalajangersakkat

§ 1. Naalakkersuisut ikiaroorartut, tassunga ilanngullugit ikiaroorartut assigiinngitsut nunani tamalaani aalajangersakkat naapertorlugit imaluunniit Nunatsinni Nakorsaaneqarfiup naliliinera malillugu ikiaroornermik sunniuteqartartunik akoqarneri imaluunniit ikiaroorartumik akoqartutut ilimagineqarneri pissutigalugit immikkut ulorianarluinnartut pillugit malittarisassanik imatut aalajangersaasinnaapput:

- 1) Naalakkersuisut immikkut illuinnartumik tamatumunnga akuersinngippata ikiaroorartunik maani nunamiittoqassanngitsoq. Akuersissummut piumasaqaatinik Naalakkersuisut aalajangersaasinnaapput. Akuersissut tunniunneqarsimasoq kingusinnerusukkat atorunnaarsinneqarsinnaavoq.
- 2) nakorsaatitit ilisimatusarnermulluunniit atatillugu taamaallaat atorneqassasut.

§ 2. Nunatta Nakorsaataasivia ikiaroorartunik § 1, nr. 2 naapertorlugu eqquassinissamut annissinissamullu, tuniniaanissamut, pisinissamut, sananissamut piareersaanissamullu akuerisaavoq.

Imm. 2. Nunatta Nakorsaataasivia, napparsimavinni nakorsaataasiviit kiisalu inuit suliffeqarfiillu matumunnga Naalakkersuisunit immikkut akuerineqarsimasut ikiaroorartunik § 1, nr. 2 naapertorlugu tunniussinissamut, tigusinissamut paarisqaarnissamullu akuerisaapput. Pineqartut siuliani taaneqartutut iliuuseqarnerannut tunngatillugu killilersuutinik nalinginnaasunik aammalu pineqartunut tamanut immikkut killilersuutinik Naalakkersuisut aalajangersaasinnaapput, soorlutaaq Naalakkersuisut ikiaroorartunut tunngatillugu pisinnaatitaaffinnik killiliisinnaasut atorunnaarsitsisinnaasulluunniit.

Imm. 3. Nunatta Nakorsaataasiavianit napparsimavinnilu nakorsaataasivinnit ikiaroorartunik pisineq tigusinerlu kiisalu paarisqaarneq, malittarisassat atuuttut naapertorlugit nakorsaatissanut allagartaq allagartarlunniit inniminniissut naapertorlugu inunnut pissarsisunut inerteqqutaanngillat.

Imm. 4. Imm. 1-3 pinnagit ikiaroorartunik § 1-imi taaneqartunik eqqussineq annissinerlu, tuniniaaneq, pisineq, tunniussineq, tigusineq, sananeq, piareersaaneq paarisqaarnerlu aamma inerteqqutaapput.

Akuersissutit

§ 3. Nunatta Nakorsaaneqarfia § 1, nr. 1, aamma § 2, imm. 2 naapertorlugu oqartussatut isumaginnissaaq.

Imm. 2. Naalackersuisut Nunatta Nakorsaaneqarfiata akuersissutinut tunngasunik sulineranut akiliutinik inunnit suliffeqarfinniilluunniit tamakkiisumik ilaannakortumilluunniit akileqqusineranut akiliinermullu malittarisassanik aalajangersaasinnaapput. Akitsuutit sulianut aalajangersimasunut Nunatta Nakorsaaneqarfiata sularisaanut imaluunniit Nunatta Nakorsaaneqarfiata nalinginnaasumik sularisartagaanut, tassunga ilanngullugit nakkutilliineranut ukiumoortumik akitsuutaatinneqassapput.

Nakkutilliineq

§ 4. Naalackersuisut nakkutilliineq pillugu malittarisassanik, § 1-ip kiisalu § 2, imm. 1 oqaaseqatigiit aappaat malillugit maleruarneqarnerannik qulakkeerinnittunik, tassunga ilanngullugit eqqartuussiviit akuersiteqqaarnagit malittarisassat taaneqartut malinneqarnissaannik nakkutilliineq siunertaralugu nakkutilliinermik oqartussat ininut sumiiffinnuunniit allanut isersinnaanerit pillugu malittarisassanik aalajangersaasinnaapput.

Imm. 2. Oqartussat nakkutilliisut taamatuttaaq eqqartuussiviit akuersiteqqaarnagit uninngasuutinut, atuakkanut, niuernermi pappialaatinut paasissutissanullu allanut, nakkutilliinerup naammassinissaanut pisariaqartunut tunngasunik piunasaqarsinnaapput.

Pineqaatissiisutit pillugit aalajangersakkat

§ 5. § 2, im. 4-mik unioqutitsineq Pinerluttulerinermi inatsimmi malittarisassat malillugit pineqaatissiisutiginneqarsinnaavoq inatsisitigullu allatut malitseqartinneqarsinnaalluni.

Imm. 2. Inatsisartut inatsisaat manna naapertorlugu najoqqutassanut atuutilersinneqartunut Pinerluttulerinermi inatsimmi malittarisassat malillugit pineqaatissiisutinik inatsisitigullu malitseqartitsissutissanik allanik aalajangersaasoqarsinnaavoq.

Imm. 3. Inatsisartut inatsisaat imaluunniit Inatsisartut inatsisaat naapertorlugu najoqqutassat atuutilersinneqartut akiliisitsissummik aalajangersaanissamut tunngavissiisimappata, akiliisitsissut pinerluttulerinermi inatsimmi malittarisassat naapertorlugit inatsisitigut pisinnaatitaasumut pisussaataasumullu akileqquneqarsinnaavoq.

Imm. 4. Pineqaatissiisutissamik uuttortaanermi ikiaroorartut pineqartut ajoqusiisinnaanerit isiginiarneqassaaq. Tamatuma saniatigut uku annertuumik sakkortusaataasussatut isigineqassapput:

- 1) Ikiaroorartunik immikkut ulorianartunik ajoqusiisinnaasunilluunniit arlaleriarluni tuniniaasoqartarsimanera, imaluunniit
- 2) Ilinniarfeqarfinni, neriniartarfinni, tassunga ilanngullugit qitigiartarfinni imaluunniit tusarnaartitsinerni aamma festivalini ikiaroorartunik § 1-imi pineqartunik tuniniaasoqarsimanera imaluunniit kingusinnerusukkat tuniniaanissaq siunertaralugu akeqanngitsumik tunniussisoqarsimanera. Tamannattaq aaqqissuussinerni allani meeraanerusut imaluunniit inuusuttuunerusut peqataaffiginerusartagaanni atuuppoq.

Imm. 5. Akiliisitsinerit arsaarinninnerillu imm. 1-3 malillugit aalajangersarneqartut Nunatta Karsianut

tutsinneqassapput.

§ 6. Inuk eqqunngitsunik paatsoorneqarsinnaasunillu paasissutissiinikkut peqquserlulluniluunniit nipangiussinermigut Inatsisartut inatsisaat imaluunniit taanna naapertorlugu najoqqutassat atuutilersinneqartut naapertorlugit akuersissummik pissarsisoq pissarsiniartorluunniit, imaluunniit akuersissummut piumasaqaatit akerlianik iliortoq pinerluttulerinermi inatsimmi malittarisassat naapertorlugit pineqaatissinneqassaaq.

Imm. 2. Aamma inuk ikiaroorartunik § 1-imi pineqartunik nakorsaatissanut allagartaq allagartarluunniit inniminniissut imaluunniit ikiaroorartunik nakorsap nakorsaatissiissutaa pillugit saaffiginninnermini aterminik, najukkaminik atorfimminilluunniit eqqunngitsumik paasissutissiisoq pineqaatissinneqassaaq.

Atuutilersitsinermut atorunnaarsitsinermullu aalajangersakkat

§ 7. Inatsisartut inatsisaat 1. januar 2023-mi atuutilissaaq.

Imm. 2. Tamatuma kingorna ikiaroorartut pillugit inatsit nr. 169, 24. maj 1955-imeersoq (lov nr. 169 af 24. maj 1955 om euforiserende stoffer) Kalaallit Nunaannut atuukkunnaassaaq.

Namminersorlutik Oqartussat, ulloq 25. november 2022

Múte Bourup Egede
Naalakkersuisut Siulittaasuat